

**Votaziun dal pievel dals  
29 da novembre 2009  
Explicaziuns dal cussegl federal**

- 1 Finanziaziun speziala  
dal traffic aviatic**
- 2 Iniziativa dal pievel  
«per in scumond d'exportar  
material da guerra»**
- 3 Iniziativa dal pievel  
«cunter la construcziun  
da minarets»**



Schweizerische Eidgenossenschaft  
Confédération suisse  
Confederazione Svizzera  
Confederaziun svizra



## Davart quai vegni votà

### Finanziazjun speziala per incumbensas en il sectur dal traffic aviatic

Ils retgavs da la taglia sin ils carburants d'aviatica van oz d'ina vart a la cassa federala generala, da l'autra vart a favur dal traffic sin via. Tras la midada da l'artitgel 86 da la constituzun federala vulan il cussegl federal ed il parlament stgaffir la premissa, per che questas entradas fiscalas gajjan en l'avengnir a favur da la cassa federala generala e dal traffic aviatic.

Emprim  
project

Infurmaziuns davart quest project

paginas 4–11

Text da votaziun

pagina 8

### Iniziativa dal pievel «per in scumond d'exportar material da guerra»

Segund  
project

Questa iniziativa vul scumandar d'exportar material d'armament e pretenda che la confederaziun promovia las stentas internaziunalas en il sectur dal discharrament e da la controlla da l'armament. Il cussegl federal ed il parlament refusan questa iniziativa senza cuntraproposta.

Infurmaziuns davart quest project

paginas 12–21

Text da votaziun

paginas 17–18

### Iniziativa dal pievel «cunter la construcziun da minarets»

Terz  
project

Questa iniziativa vul scumandar la construcziun da minarets en Svizra. Il cussegl federal ed il parlament refusan questa iniziativa senza cuntraproposta, perquai ch'ella violescha ils dretgs fundamentals e perquai ch'ella na schlia nagins problems, mabain stgaffescha mo novs.

Infurmaziuns davart quest project

paginas 22–29

Text da votaziun

pagina 26

## **Finanziaziun speziale per incumbensas en il sectur dal traffic aviatic**

**La dumonda da votaziun sa cloma:**

Vulais Vus acceptar il conclus federal dals 3 d'october 2008  
davart la **creaziun d'ina finanziaziun speziale per incumbensas  
en il sectur dal traffic aviatic?**

**Il cussegl federal ed il parlament recumondan d'acceptar  
quest project.**

Il cussegl naziunal ha acceptà il project cun 124 cunter 63 vuschs  
e cun 4 abstensiuns, il cussegl dals chantuns cun 33 cunter 7 vuschs  
e cun 3 abstensiuns.

## Il pli impurtant en furma concisa

Sin tut ils carburants, er sin ils carburants d'aviatica, incasse-scha la confederaziun ina taglia ed ina taglia supplementara. Questa obligaziun da pajar taglia vala per sgols interns e privats, betg dentant per sgols kommerzials a l'exteriur. Ils retgavs da la taglia sin ils carburants d'aviatica van oz d'ina vart a la cassa federala generala (50 pertschient dal retgav net) e da l'autra vart a favur dal traffic sin via (50 pertschient dal retgav net plus 100 pertschient da la taglia supplementara).

Regulaziun  
vertenta

Tras la midada da l'artitgel 86 da la constituziun federala duai vegnir realisà il princip da l'autenticidad dals custs tar la taglia sin ils carburants d'aviatica: Da nov duain las entradas ir a favur da quel med da transport che las ha pajadas. I duai pia valair la medema regulaziun sco per il traffic sin via. Ina mesadad dal retgav net va a la cassa federala. L'autra mesadad e la taglia supplementara – tut en tut var 40 milliuns francs per onn – van a favur da l'aviatica. Quests daners duain vegnir appligads per la segirezza tecnica, per la protecziun cunter attentats terroristics e per la protecziun da l'ambient.

Nova  
regulaziun

Il cussegl federal ed il parlament sustegnan quest project. Igl è gist che l'aviatica survegn puspè ina part da las taxas ch'ella ha pajà. Questa midada na chaschuna naginas taxas supplementaras – ni per las consumentas e per ils consu-ments ni per l'economia.

Puntg da vista  
dal cussegl federal  
e dal parlament

## Il project da votaziun en detagi

En ses rapport davart la politica d'aviatica ha il cussieg federal fixà l'onn 2004 las finamiras per il traffic aviatic: Quel duai sa sviluppar uschenavant sco pussaivel resguardond il princip d'in svilup durabel. El duai colliar la Svizra cun ils centers internaziunals ed avair in standard da segirezza aut en la cumparegliazun europeica. Per quest intent dovra il traffic aviatic cundiziuns generalas uschè avantagiusas sco pussaivel, che rinforzan en spezial sia cumpetitivitat. Perquai ha il cussieg federal proponì d'attribuir en l'avegnir a l'aviatica ils retgavs da la taglia sin ils carburants d'aviatica, eliminond uschia il tractament inequal tranter il traffic aviatic ed il traffic sin via.

Oz va la mesadad dal retgav net da la taglia sin ils carburants d'aviatica a la cassa federala generala, l'autra mesadad e l'entira taglia supplementara veggan appligadas per finanziar il traffic sin via. A la taglia èn suttamess sgols interns e privats. Il traffic aviatic kommerzial a l'exterior è liberà da l'obligazion da pajar taglia sin basa d'ina convenziun da l'organisaziun d'aviatica civila da la ONU ch'è veginida suttascritta er da la Svizra.

Tras il project per la creaziun d'ina finanziaziun speziala per incumbensas en il sectur dal traffic aviatic<sup>1</sup> vegn stgaffida la basa per ina nova repartizion dals daners. Perquai che l'incassament e l'utilisaziun da las taglias sin ils carburants èn francads en l'artitgel 86 da la constituzion federala, sto vegnir midada questa disposiziun, e quai dovra il consentiment dal pievel e dals chantuns. Il nov text da la constituzion prevesa da dar en l'avegnir a l'aviatica quella part dals retgavs da la taglia sin ils carburants d'aviatica che va oz a favur dal traffic sin via. Per tge incumbensas dal traffic aviatic che questi daners han da vegnir duvrads, vegn medemamain reglà en il

<sup>1</sup> Da finanziaziuns spezialas vegni discurrì, sche las entradas ston vegnir duvradas obligatoricamain per ademplir ina tscherta incumbensa.

Eliminar  
in tractament  
inequal

Taglia sin ils  
carburants  
d'aviatica

Nova repartizion  
dals retgavs  
fiscals

text da la constituziun: Ils daners vegnan impundids per la promozion d'in aut nivel da segirezza tecnica, per mesiras da segirezza cunter attentats terroristics e per mesiras da la protecziun da l'ambient.

Sin il stgalim da la lescha stoi vegnir reglè pli tard, per tge mesiras concretas ch'ils daners da la taglia sin ils carburants d'aviatica duain vegnir utilisads. En discussiun èn ils suan-dants secturs: finanziaziun da la segirezza da sgol da las plaz-zas aviaticas regiunalas (promozion da la segirezza tecnica), contribuziuns a controllas da passagieras, da passagiers e da bagascha sin ils eroports (segirezza cunter attentats terrori-stics) sco er installaziun da fanestras isoladas cunter la canera en immobiglias ch'en exponidas a la canera da l'aviatica.

Las entradas bruttas da la taglia sin ils carburants d'aviatica importan en media 60 milliuns francs per onn. Sche quest project vegn acceptà, restan – suenter la deducziun da la quota per la cassa federala generala – var 40 milliuns francs per l'aviatica. La clav per reparter quests meds finanzials sto vegnir definida dal parlament. Igl è previs d'impunder ina mesedad dals daners (20 milliuns francs) per la segirezza tec-nica; il rest duai vegnir applitgà per mesiras cunter attentats terroristics (10 milliuns francs) e per la protecziun da l'am-bient (10 milliuns francs).

Tras questa nova regulaziun sa reduceschan las entradas da la finanziaziun speziala dal traffic sin via per var 40 milliuns francs per onn. Quai correspunda ad 1,3 pertschient dals meds finanzials ch'il traffic sin via survegn da la taglia sin ils carburants.

Utilisaziun  
pussaivla

Fixaziun da la  
clav da repartiziun  
en la lescha

Pli paucs meds  
finanzials per il  
traffic sin via



## Text da votaziun

### Conclus federal

**davart la creaziun d'ina finanziaziun speziala per incumbensas  
en il sectur dal traffic aviatic**

dals 3 d'october 2008

*L'assamblea federala da la confederaziun svizra,  
suenter avair gi invista da la missiva dal cussegl federal dals 29 d'avust 2007<sup>1</sup>,  
concluda:*

#### I

La constituziun federala<sup>2</sup> vegn midada sco suonda:

*Art. 86 al. 3 frasa introductiva, al. 3<sup>bis</sup> ed al. 4*

<sup>3</sup> Ella [la confederaziun] applitgescha la mesadad dal retgav net da la taglia da consum sin tut ils carburants, cun excepciu dals carburants d'aviatica, sco er il retgav net da las taxas per las vias nazionalas per las suandantas incumbensas ed expensas en connex cun il traffic sin via:

<sup>3bis</sup> Ella applitgescha la mesadad dal retgav net da la taglia da consum sin tut ils carburants d'aviatica per las suandantas incumbensas ed expensas en connex cun il traffic aviatic:

- a. las contribuziuns vi da las mesiras da la protecziun da l'ambient che daven tan necessarias pervia dal traffic aviatic;
- b. las contribuziuns vi da mesiras da segirezza per proteger il traffic aviatic cunter acts illegals, en spezial attentats terroristics e rapiments, uschenavant che questas mesiras n'en betg chaussa d'autoritads statalas;
- c. las contribuziuns vi da mesiras per promover in aut nivel da segirezza tecnica en il traffic aviatic.

<sup>4</sup> Sche quests meds na tanschan betg per las incumbensas e per las expensas en connex cun il traffic sin via u cun il traffic aviatic, incassescha la confederaziun sin ils carburants respectivs in supplement tar la taglia da consum.

#### II

Quest conclus è suttamess a la votaziun dal pievel e dals chantuns.

<sup>1</sup> fegl uffizial federal 2007 6373

<sup>2</sup> CS 101

## Las tractativas en il parlament

Per las chombras federalas èsi stà incontestà ch'ils retgavs da la taglia sin sgols interns e privats duajan vegnir utilisads per incumbensas en il sectur dal traffic aviatic. Dispitaivla è dentant stada la dumonda, sche e quant enavant che l'intent d'utilisaziun duaja vegnir reglègia en la constituziun u pir pli tard en la lescha.

Retgavs fiscals  
per l'aviatica

Las duas chombras dal parlament han discutà differentas soluziuns per l'utilisaziun dals daners. Ina gronda maioritat ha sustegni la proposta ch'ina part da las entradas da la taglia sin ils carburants d'aviatica duaja vegnir duvrada per la segirezza tecnica e per mesiras per la protecziun da la populaziun cunter la canera da l'aviatica.

Utilisaziun  
dals daners

Il puntg da discussiun principal ha pertutgà la dumonda, sch'i duajan vegnir finanziadas er mesiras da segirezza ch'en vegnidas pajadas fin ussa dals eroports, sco per exemplu la controlla da passagieras, da passagiers e da bagascha u la surveglianza d'aviuns. La maioritat ha sustegni questa soluziun, perquai ch'ella distgargiass e promovess en spezial las pazzas aviaticas regiunalas. Ina minoritat ha crititgà che la distgargia da l'aviatica chaschunia ina chargia supplementara per las finanzas federalas en l'autezza da var 40 milliuns francs.

Promoziun  
disputaivla da las  
pazzas aviaticas  
regiunalas

## Ils arguments dal cussegli federal

Ina finamira impurtanta da la politica svizra d'aviatica è da garantir colliaziuns optimalas tranter noss pajais ed ils centers internaziunals e pia da rinforzar la Svizra sco plazza economica. Per meglierar la cumpetitivitat da l'aviatica duai il traffic aviatic survegnir en l'avegnir quels retgavs da la taglia sin ils carburants d'aviatica che van oz a favur dal traffic sin via. Els duain vegnir impundids en spezial per la finanziaziun da mesiras en il sectur da la segirezza e da l'ambient. Il cussegli federal sustegna il project en spezial per ils sustants motivs:

L'aviatica ha ina gronda impurtanza per l'economia publica svizra. Ella è in element essenzial da la politica economica exteriura ed in faktur central per la Svizra sco plazza economica. Ina finamira impurtanta da la politica svizra d'aviatica è da colliar optimalmain noss pajais cun ils centers internaziunals impurtants. Per quest intent duai vegnir rinforzada l'industria d'aviatica svizra, perquai ch'ella è suttamessa ad ina concurrenz internaziunala cun in grond squitsch da custs. Quai po vegnir cuntanschiè tranter auter cun dar a l'aviatica en l'avegnir ils retgavs da la taglia sin ils carburants d'aviatica che van ussa a favur dal traffic sin via. Quests daners duain vegnir duvrads resguardond il princip d'in svilup durabel.

Rinforzar  
la cumpetitivitat  
da l'aviatica

Ils retgavs da la taglia sin ils carburants d'aviatica èn bain pli-tost modests en comparegliaziun cun las entradas totalas da las taglias sin ils carburants che importan passa 3 milliardas francs. Tuttina permettan els da finanziar mesiras che rendan il traffic aviatic tut en tut pli segir e pli ecologic. Ultra da quai eliminescha la midada constituziunala proponida er in lung tractament inequal tranter il traffic aviatic ed il traffic sin via.

In traffic aviatic  
pli segir e pli  
ecologic

Sch'il project vegniss refusà, tutgass quai en spezial las plazas aviaticas regiunalas. Senza ils daners da la taglia sin ils carburants d'aviatica na po la segirezza da sgol da las plassas aviaticas regiunalas betg pli cuvrir ses custs. Quai pervia da novas reglas europeicas che na permettan betg pli a la segirezza da sgol dals eroports naziunals da confinanziar la segirezza da sgol da las plassas aviaticas regiunalas. Sch'il project vegniss refusà, stuess la segirezza da sgol da las plassas aviaticas regiunalas perquai ubain tschertgar novas funtaunas da finanziazion ubain stritgar tscherts servetschs. Quai stess dentant en cuntradicziun cun las stentas da la confederaziun d'augmentar la segirezza dal traffic aviatic en Svizra en general, ma er la segirezza da sgol da las plassas aviaticas regiunalas.

La segirezza da sgol  
da las plassas  
aviaticas regiunalas  
fiss perclitada

**Per tut quests motivs recumondan il cussegli federal ed il parlament d'acceptar quest project.**

## **Iniziativa dal pievel**

**«per in scumond d'exportar material da guerra»**

**La dumonda da votaziun sa cloma:**

Vulais Vus acceptar l'iniziativa dal pievel  
**«per in scumond d'exportar material da guerra»?**

**Il cussegl federal ed il parlament recumondan da refusar l'iniziativa.**

Il cussegl naziunal ha refusà l'iniziativa cun 131 counter 63 vuschs senza abstensiuns, il cussegl dals chantuns cun 35 counter 7 vuschs e cun 3 abstensiuns.

## Il pli impurtant en furma concisa

La Svizra dispona tradiziunalmain d'ina industria d'armament impurtanta. Quella furnescha material d'armament a l'armada svizra, fa il servetsch da mantegniment ed exportescha material d'armament a l'exterior. La valurisaziun da quests exports han importà l'onn 2007 (ultima retschertga) circa 500 milliuns francs. Mo per producir il material d'armament exportà èn stadas occupadas il medem onn var 5100 persunas.

L'intent central da l'iniziativa è in scumond d'exportar material d'armament. Tenor l'avis dal comité d'iniziativa n'è l'economia da la Svizra betg dependenta dals exports d'armas. Per mitigiar las consequenzas da quest scumond per l'economia e per ils fatgs d'occupaziun duai la confederaziun sustegnair las regiuns e las persunas emploiadadas pertutgadas durant diesch onns.

Il cussegl federal ed il parlament refusan l'iniziativa. L'iniziativa periclitescia ina branscha d'industria impurtanta e pliras milli plazzas da laver. Senza la pussaivladad da l'export na pudess l'industria d'armament strusch surviver. Il sustegn ch'è previs per compensar las consequenzas economicas respectivas chaschunass per la confederaziun – ensamen cun las perditas da la taglia e da l'assicuranza sociala – custs totals da passa 500 milliuns francs. La finala periclitass l'iniziativa la segirezza da la Svizra, perquai che l'armament da noss pajais dependess – en cas d'ina crisa u d'ina guerra – cumplettamain ed unilateralmain d'auters stadis.

Industria  
d'armament:  
impurtanta  
per l'economia  
e per l'armada

Tge vul  
l'iniziativa?

Puntg da vista  
dal cussegl federal  
e dal parlament

## **Il project da votaziun en detagl**

Suenter la publicazion da la statistica d'exports da material da guerra per l'onn 2005 ha la gruppia per ina Svizra senza armada (GSsA) prendì en mira in scumond total d'exports d'armas. Ella ha fundà il comité d'iniziativa «coaliziun cunter ils exports da material da guerra» ed ha inoltrà ils 21 da settembre 2007 l'iniziativa qua avant maun. Quella cuntegna trais pretensiuns principalas:

Origin  
da l'iniziativa

Primo pretenda l'iniziativa che la confederaziun sustegnia e promovia stentas internaziunalas per in discharmorament e per ina controlla da l'armament. Las pretensiuns respectivas a la confederaziun èn dentant formuladas en moda generala. La moda e maniera e la dimensiun da quest sustegn na vegnan betg prescrittas.

Promoziun dal  
discharmorament  
e da la controlla  
da l'armament

Secundo pretenda l'iniziativa in scumond da l'export e dal transit da material d'armament. En quest connex sa tracti per exemplu da chanuns da defensiun cunter aviuns, d'aviuns da trenament militars, da simulaturs militars, dal know-how e da la proprietad intellectuala correspundenta. Er duain vegnir scumandads l'intermediaziun ed il commerzi cun tala rauba, sche la retschavidra u sch'il retschavider ha sia sedia u ses domicil a l'exterior. Quests scumonds entrassan immediatamain en vigur, sche l'iniziativa vegniss acceptada.


Scumond  
da l'export  
e dal transit  
da material  
d'armament

Terzio prevesa l'iniziativa che la confederaziun sustegnia las regiuns pertutgadas sco er las emploiadadas ed ils emploiad pertutgads durant diesch onns. Cun questas mesiras accumpanantas duain vegnir cumpensadas las consequenzas per l'economica e per ils fatgs d'occupaziun. Il text da l'iniziativa na di nagut davart la realisaziun da quest sustegn. Il parlament stuess l'emprim deliberar disposiziuns legalas correspondantas.

Mesiras  
accumpagnantas:  
sustegn tras la  
confederaziun

## Controllas efficazias e transparentas per l'export:

**Material da guerra: exports tenor continent (en milliuns francs)**



- **La Svizra appligescha criteris da permissiun severs per l'export da material da guerra.** Exclusas èn uschia per exemplu furniziuns a partidas da conflict u a stadis che violeschan sistematicamain e grevamain ils dretgs umans. Er als pajais ils main sviluppads na dastgan vegnir furnidas nagini armas da guerra.
- **Cuntrari a blers auters stadis da l'Europa permetta la Svizra l'export da material da guerra en l'Africa, en l'Asia, en il Proxim Orient sco er en l'America centrala ed en l'America latina mo cun fitg gronda retegnientscha.** Pervia da la situaziun dals dretgs umans ch'era avant maun questa primavaira en tscherts pajais, ha il cussegl federal refusà pliras dumondas per il Proxim Orient e per l'Asia.

- En il passà è la gronda part (passa 75 %) dal material da guerra vegnì exportà en stadis che represchentan valurs ch'èn per gronda part las medemas sco quellas da la Svizra. I sa tracta da pajais sco l'Australia, l'Austria, la Belgia, il Danemarc, la Finlanda, la Germania, ils Stadis unids u la Svezia.
- La Svizra è sin l'emprima plazza en quai che pertutga la transparenza davart l'export dad armas a caliber pitschen e dad armas levas. L'institut independent da Genevra per studis internaziunals davart las dumondas da svilup *Graduate Institute of International and Development Studies* examinescha mintga onn en in studi la transparenza dals pajais respectivs en connex cun l'export dad armas a caliber pitschen e dad armas levas. L'onn 2009 ha la Svizra occupà l'emprima plazza.  
Ulteriuras infurmaziuns: [www.smallarmssurvey.org](http://www.smallarmssurvey.org).
- En cas d'abus prenda la Svizra immediatamain mesiras. Mesirà cun il grond dumber da las dumondas d'export che vegnan permessas mintga onn, èn abus fitg rars. Avant circa dus onns è in aviun da trenament militar, che la Svizra aveva furnì al Tschad, vegnì malduvrà per auters intents; plinavant èn aubizas armadas, ch'eran vegnididas exportadas da la Svizra, vegnididas spedidas vinavant illegalmain avant in pèr onns en il Maroc. Il cussegli federal ha reagì immediatamain cun ina suspensiun dals exports, ha prendì sancziuns unilateralas ed ha deliberà regulaziuns legalas pli severas.

Ulteriuras infurmaziuns davart las controllas da l'export da material d'armament: [www.ruestungsexpte.admin.ch](http://www.ruestungsexporte.admin.ch)



## Text da votaziun

### Conclus federal

### davart l'iniziativa dal pievel «per in scumond d'exportar material da guerra»

dals 12 da zercladur 2009

*L'assamblea federala da la confederaziun svizra,*

sa basond sin l'artitgel 139 alinea 3 da la constituziun federala<sup>1</sup>,  
suenter avair examinà l'iniziativa dal pievel «per in scumond d'exportar material da  
guerra»<sup>2</sup> ch'è vegnida inoltrada ils 21 da settember 2007,  
suenter avair già invista da la missiva dal cussegli federal dals 27 d'avust 2008<sup>3</sup>,  
*concluda:*

### Art. 1

<sup>1</sup> L'iniziativa dal pievel dals 21 da settember 2007 «per in scumond d'exportar mate-  
rial da guerra» è valaivla e vegn puttamessa a la votaziun dal pievel e dals chantuns.

<sup>2</sup> Ella sa cloma:

I

La constituziun federala vegn midada sco suonda:

*Art. 107 al. 3 (nov)*

<sup>3</sup> Ella [la confederaziun] sostegna e promova las stentas internaziunalas per in disch-  
armament e per ina controlla da l'armament.

*Art. 107a (nov)* Export da material da guerra e da rauba militara speziala

<sup>1</sup> L'export ed il transit èn scumandads:

- a. per material da guerra inclusiv armas a caliber pitschen ed armas levas sco er per lur munizion;
- b. per rauba militara speziala;
- c. per rauba immateriala inclusiv tecnologias ch'èn d'ina impurtanza essenziala per sviluppar, per producir u per duvrar rauba tenor las literas a e b, nun ch'ellas sajan accessiblas publicamain u servian a la perscrutazion scientifica da basa.

<sup>2</sup> Exceptads dal scumond d'export e da transit èn apparats che servan a la demina-  
ziun umanitara sco er armas da sport e da chatscha ch'èn cleramain renconuschiblas sco talas e che n'èn – sco medem model – betg er armas da cumbat, inclusiv lur mu-  
niziun.

<sup>1</sup> CS 101

<sup>2</sup> fegl uffizial federal 2007 7219

<sup>3</sup> fegl uffizial federal 2008 7521



<sup>3</sup> Exceptà dal scumond d'export è l'export da rauba tenor l'alinea 1 tras autoritads da la confederaziun, dals chantuns e da las vischnancas, uschenavant che questa rauba resta en lur proprietad, uschenavant che la rauba vegr duvrada da l'agen persunal ed uschenavant che questa rauba vegr puspè repatriada, cur che la missiun è terminada.

<sup>4</sup> L'intermediaziun ed il commerzi cun rauba tenor ils alineas 1 e 2 èn scumandads, sche la retschavidra u sch'il retschavidra ha sia sedia u ses domicil a l'exterior.

## II

Las disposiziuns transitoricas da la constituziun federala vegrnan midadas sco suonda:

*Art. 197 cifra 8<sup>4</sup> (nov)*

*8. Disposiziun transitorica tar l'art. 107a*

*(Export da material da guerra e da rauba militara speziala)*

<sup>1</sup> La confederaziun sostegna durant 10 onns, suenter ch'il pievel ed ils chantuns han acceptà l'iniziativa dal pievel «per in scumond d'exportar material da guerra», las regiuns sco er las emploiadas ed ils emploiads ch'en pertutgads dal scumond tenor l'artigel 107a.

<sup>2</sup> Suenter ch'ils artitgels 107 alinea 3 e 107a èn vegnids acceptads dal pievel e dals chantuns, na dastgan vegnir dadas naginas novas permissiuns per activitads tenor l'artigel 107a.

## **Art. 2**

L'assamblea federala recumonda al pievel ed als chantuns da refusar questa iniziativa.

<sup>4</sup> La numeraziun da la cifra da questa disposiziun transitorica tar l'artigel qua avant maun vegr fixada suenter la votaziun dal pievel.

## Ils arguments dal comité d'iniziativa

### GEA al scumond d'exportar material da guerra

Chars armads da la Mowag en l'**Afghanistan**, granatas da maun da la Ruag en l'**Irac** u aviuns da la Pilatus a **Darfur**: armas svizras mazzan sin tut il mund civilistas e civilists innocents. L'onn passà è gist il **Pakistan**, cun sias fuainas da conflicts, stà il client il pli grond da nossa industria d'armament. D'ina pratica da permissiun restrictiva na pon ins pia insumma betg discurrer. La neutralitat e la tradizion umanitara da la Svizra èn messas en dumonda.

Economicamain è in scumond d'exportar armas supportabel: material da guerra e «rauba militara speziala» represchentan ensemens **mo 0,44 per-tschient da noss exports da rauba**. Rauba che po vegnir duvrada en duas modas («dual use») n'è betg pertutgada da l'iniziativa. Regiuns sco er lavurantas e lavurants pertutgads vegnan sustegnids durant 10 onns per midar a branschas economicas civilas.



Dals exports svizzers d'ina valur da 100 francs derivan main che 45 raps da l'industria d'armament (tenor SECO/BAK Basel Economics).

Er la giustificaziun militara dals exports d'armas n'arriva betg da persvader: en cas da guerra na pudess la Svizra tuttina betg far quint cun la **«atgna» industria d'armament**. L'Oerlikon Contraves appartegna già daditg a l'interpresa **tudestga Rheinmetall** e la Mowag è en possess da la societad **americana General Dynamics**.

Il scumond d'exportar material da guerra vegn ad esser in signal ferm **per la pasch sin quest mund** che dat a la Svizra ina nova credibilitad sin plau internaziunal. Sajas disfidantas e disfidants envers la propaganda dramatisanta da la lobi d'armament e **votai GEA** a l'iniziativa dal pievel per in scumond d'exportar material da guerra.

Ulteriuras infurmaziuns: [www.kriegsmaterial.ch](http://www.kriegsmaterial.ch)



La Svizra po exportar megliers products che armas.

## Ils arguments dal cussegl federal

Per il cussegl federal èn la promozion da la segirezza e da la pasch sin il mund, l'observaziun dals dretgs umans e la promozion dal bainstar finamiras centralas da la politica exteriura da la Svizra. La politica en dumondas da l'export d'armas sto resguardar questas finamiras. Ella na dastga dentant betg tralaschar ils interess da la defensio naziunala, da la segirezza da la Svizra ed ils aspects economics. Il cussegl federal refusa l'iniziativa cunzunt per ils sustants motivs:

En l'industria d'armament gioga la perscrutaziun da novas tecnologias e da novs materials ina rolla impurtanta. L'iniziativa periclitescia questa branscha industriala innovativa e cha-schuna ina perdita da know-how. Ultra dals gronds manaschis d'armament èn er pertutgadas numerusas interpresas mesau-nas e pitschnas che na produceschan sezzas sco furnituras nagin material d'armament, che perdessan dentant ina part da lur incaricas en cas che l'iniziativa vegniss acceptada.

Uschia periclitescia l'iniziativa pliras milli pazzas da lavur en l'industria d'armament ed en ils manaschis da furniziun. Pertutgads spezialmain fissan ils chantuns Turitg, Berna, Turgovia, Lucerna e Sutsilvania. Numerusas interpresas produceschan ultra dal material d'armament er rauba civila. Las consequen-zas economicas d'in scumond d'export badassan ins lunsch sur l'industria d'armament sco tala or.

In scumond total d'exportar material d'armament periclitass la segirezza da la Svizra. Ina industria d'armament indigena gida a garantir in provediment sufficient cun material d'arma-ment en cas d'ina crisa u d'ina guerra. Il basegn da material d'armament che l'armada svizra ha, è dentant memia pitschen per ina producziun economica. Tras in scumond d'export stuessan las interpresas pertutgadas serrar lur portas u disch-locar lur producziun a l'exterior. Per ses armament fiss l'ar-mada svizra pia dependenta dal tuttafatg d'auters stadis.

Periclitaziun  
d'ina branscha  
industriala  
innovativa e da  
pazzas da lavur

Periclitaziun  
da la segirezza  
da la Svizra

Il sustegn che la confederaziun avess da prestar tenor l'iniziativa durant diesch onns dastgass chaschunar – ensemens cun las perditas da la taglia e da l'assicuranza sociala – custs totals da passa 500 milliuns francs. Ultra da quai èsi problematica da ruinar l'emprim ina branscha industrialia innovativa cun in scumond d'export e da cumpensar alura il donn cun medis finanzials dal maun public. En cas che l'iniziativa vegniss acceptada, na fissi betg pussaivel da dar immediatamain quest sustegn finanzial, perquai che la basa legala manca anc. Ultra da quai na pudess la mancanza da pazzas da lavur attractivas betg vegnir cumpensada cun daners.

La legislaziun vertenta permetta ina controlla da l'export da material d'armament che funcziunescha e che tegna quint dals interess da la Svizra e da sia economia. Il sustegn dal discharament e da la controlla da l'armament, che vegn pretendi da l'iniziativa, correspunda ad ina finamira da la politica da l'exterior che la Svizra persequitescha da vegl ennà e ch'ella resguarda en il rom da la controlla da l'export. Cumpareglìa cun auters stadis è la controlla da l'export da la Svizra fitg restrictiva; ella è sa cumprovada sco via raschunavila che tegna quint dals interess da tut las parts.

**Per tut quests motivs recumondan il cussegli federal ed il parlament da refusar l'iniziativa dal pievel «per in scumond d'exportar material da guerra».**

Sustegn tras la confederaziun:  
gronds custs  
ed effect limità

Controllas  
efficazias  
ed equilibradas  
per l'export

## **Iniziativa dal pievel «cunter la construcziun da minarets»**

**La dumonda da votaziun sa cloma:**

Vulais Vus acceptar l'iniziativa dal pievel  
**«cunter la construcziun da minarets»?**

**Il cussegl federal ed il parlament recumondan da refusar l'iniziativa.**

Il cussegl naziunal ha refusà l'iniziativa cun 132 cunter 51 vuschs  
e cun 11 abstensiuns, il cussegl dals chantuns cun 39 cunter 3 vuschs  
e cun 2 abstensiuns.

## Il pli impurtant en furma concisa

L'iniziativa dal pievel «cunter la construcziun da minarets» è vegnida inoltrada ils 8 da fanadur 2008. Ella pretenda in scumond da construir minarets en Svizra. In minaret è in edifizi en furma da tur che stat en connex cun ina moschea. Actualmain datti quatter minarets en Svizra.

Situaziun  
da partenza

Las intenziuns dal comité d'iniziativa surpassan in simpel scumond da construir minarets. Las iniziantas ed ils iniziants considereschan il minaret sco provocaziun averta envers l'urden giuridic e social da la Svizra e contestan l'impurtanza religiusa da quest edifizi.

Il motiv  
per l'iniziativa

L'iniziativa stat en cuntradiczion cun numerus dretgs fundamentals ch'en francads en la constituziun federala e cuntrafa als dretgs umans. Ella na gida betg a proteger noss urden statal, mabain perclitescha la pasch religiusa en noss pajais. Perquai refusan il cussegl federal ed il parlament questa iniziativa.

Puntg da vista  
dal cussegl federal  
e dal parlament

### Muslimas e muslims en Svizra

Tenor l'ultima dumbrazion dal pievel da l'onn 2000 vivevan var 311 000 persunas da religiun muslima en Svizra. Funtaunas scientificas partan dal fatg che la communitad muslima dumbria oz tranter 350 000 e 400 000 persunas. La gronda part dad ellas deriva da l'Europa dal sidost. En noss pajais datti var 130 fin 160 centers culturals e lieus d'uraziun muslims. Quels èn situads per gronda part en edifizis industrials, intgins en abitaziuns. Plinavant disponan var 50 fin 100 uniuns muslimas da locals d'uraziun. Actualmain datti en Svizra quatter moscheas cun minarets.

## Il project da votaziun en detagi

L'iniziativa dal pievel vul francar en la constituziun federala in scumond da construir minarets. Il minaret è in edifizi en furma da tur che inditgescha in lieu da cult. En quest regard na sa differenziescha el betg d'edifizis d'autras cuminanzas religiusas, per exemplu dal clutger d'ina baselgia cristiana.

Scumond  
da construir  
minarets

En Svizra datti oz quatter minarets, numnadamain a Genevra, a Turitg, a Winterthur ed a Wangen sper Olten. A Langenthal è vegnida dada il cumenzament da fanadur 2009 la permissiun da construir in minaret<sup>1</sup>. Sco mintga auter project da construcziun dovra er in minaret ina permissiun da construcziun. Quella premetta che tut las prescripziuns chantunalas e communalas da construcziun vegnian observadas. Plinavant sto il project ademplir las prescripziuns da la legislaziun davart la planisaziun dal territori sco er davart la protecziun da monumens istorics e dal maletg dal lieu. Sin basa da las prescripziuns davart la protecziun cunter canera po ultra da quai vegnir scumandà tut quai che pudess far canera, per exemplu autpledaders u il clom dal muezin.

Minarets  
en Svizra

Las muslimas ed ils muslims en Svizra vivan per gronda part ensemens senza problems cun cristianas e cun cristians, cun gidieus e cun gidieus, cun persunas d'autras cuminanzas religiusas sco er cun persunas senza appartegnientscha religiosa. Ellas ed els lavuran en las medemas interpresas ed abitan en ils medems lieus. Bleras e blers èn burgaisas svizras e burgais svizzers. Sco tuts ston ellas ed els respectar noss urden giuridic, han – da l'autra vart – percunter er il dretg sin in tractament equal. Quest dretg vegniss violà, sche l'iniziativa vegniss acceptada.

Dretg sin in  
tractament  
equal

<sup>1</sup> Cunter questa permissiun èsi vegnì fatg recurs tar il chantun.

Sin persunas che ageschan avertamain u zuppadamain cunter l'urden politic e social da la Svizra u che propagheschan in auter sistem giuridic, sco per exempl la scharia, n'avess in scumond da minarets nagin effect; ellas na smettessan betg cun lur agir. Per cumbatter efficaziamain tendenzas extremisticas e per segirar il fundament democratic e constituzional da la Svizra dovri auters meds. Da tals meds disponan la conferaziun ed ils chantuns gia oz.

Ulteriuras infurmaziuns sut [www.ejpd.admin.ch](http://www.ejpd.admin.ch)

In scumond da  
minarets na  
purtass nagut



## Text da votaziun

### Conclus federal

### davart l'iniziativa dal pievel «cunter la construcziun da minarets»

dals 12 da zercladur 2009

*L'assamblea federala da la confederaziun svizra,*

sa basond sin l'artitgel 139 alinea 3 da la constituziun federala<sup>1</sup>,

sunter avair examinà l'iniziativa dal pievel «cunter la construcziun da minarets»<sup>2</sup>  
ch'è vegnida inoltrada ils 8 da fanadur 2008,

sunter avair gì invista da la missiva dal cussegl federal dals 27 d'avust 2008<sup>3</sup>,

*concluda:*

### Art. 1

<sup>1</sup> L'iniziativa dal pievel dals 8 da fanadur 2008 «cunter la construcziun da minarets»  
è valaivla e vegn suttamessa a la votaziun dal pievel e dals chantuns.

<sup>2</sup> Ella sa cloma:

La constituziun federala vegn midada sco suonda:

*Art. 72 al. 3 (nov)*

<sup>3</sup> Igl è scumandà da construir minarets.

### Art. 2

L'assamblea federala recumonda al pievel ed als chantuns da refusar questa iniziativa.

<sup>1</sup> CS 101

<sup>2</sup> fegl uffizial federal 2008 6851

<sup>3</sup> fegl uffizial federal 2008 7603

## Ils arguments dal comité d'iniziativa

### Gea al scumond da minarets – na a l'islamisaziun da la Svizra

Entant che 56 600 persunas muslimas vivevan l'onn 1980 en Svizra, èn quai bain-prest bunamain in mez milliun. Quest augment rapid signifitgescha per la Svizra ina gronda sfida, perquai che las persunas muslimas na pratitgeschan qua betg mo lur religiun. Pli e pli fan ellas er valair pretensiuns politicas e giuridicas.

Il minaret n'ha da far nagut cun la religiun. Il minaret è il simbol da la pretensiun da pussanza politica e sociala da l'islam. Citond in poet tirc, ha il primminister tirc actual Erdogan ditg il suandard en chaussa: «La democrazia è mo il tren che nus prendain, fin che nus avain cuntanschì nossa finamira. Las moscheas èn nossas casernas, ils minarets nossas baionettas, las cuplas nossas chapellinas ed ils crettaivels noss schuldads». Quest citat n'ha da far nagut cun la religiun, mabain è ina pretensiun da pussanza politica. Il minaret daventa la spada da l'islamisaziun politica.

Il minaret n'ha betg ina funcziun religiusa. El na vegn menziunà nagliur en il coran. Millis da moscheas sin tut il mund n'han betg in minaret – senza che la pratica da la cretta islamica veggiss impedita qua tras.

Il minaret è la plattaforma, giu da la quala il muezin proclamescha la predominanza da l'islam. Tgi che accepta ils minarets, sto er dir gea al muezin ed a sias proclamazius. Il minaret è in segn d'ina pretensiun da pussanza politica – cumparegliabel cun las pretensiuns da sa vestgir cun la burca, il vestgì islamic che cuvra tut il corp, da tolerar maridaglias sfurzadas e da legitimar la surtagliada da mattas.

Il scumond da minarets ha la funcziun d'ina refusa clera e netta da quella islamisaziun da la Svizra che entra – tras la lescha islamica, la scharia – en in conflict direct cun las libertads e cun ils dretgs fundamentals che vegnan garantids tras la constituziun federala. Tgi che vul viver en Svizra, duai respectar nossa constituziun. Tgi che vul duvrar il minaret sco spada politica per far valair in auter dretg, la scharia, n'ha nagina piazza en noss pajais. Il scumond da minarets è la ferma expressiun da questa tenuta.

Ulteriuras infurmaziuns: [www.minarette.ch](http://www.minarette.ch)

## Ils arguments dal cussegl federal

L'iniziativa dal pievel «**cunter la construcziun da minarets»** stat en cuntradicziun cun la constituziun federala e cun il dretg internaziunal, perquai ch'ella violescha ils dretgs umans ch'en garantids tras convenziuns. Ella na schlia nagins problems, mabain stgaffescha mo novs. Il **cussegl federal** refusa l'iniziativa cunzunt per ils sustants motivs:

In scumond da construir minarets periclitescia la pasch religiusa en noss pajais. La gronda maioritad da la populaziun muslima è integrada bain e respecta l'urden giuridic e social da la Svizra. In scumond da construcziun signifitgass ina refusa da questas muslimas e da quests muslims. Quai chaschunass eventualmain conflicts da loialitat e confrontaziuns che pudessan sin il pli esser en l'interess da circuls extremistics.

Periclitaziun  
da la pasch  
religiusa

L'iniziativa violescha dretgs umans impurtants ch'en garantids tras convenziuns e stat en cuntradicziun cun dretgs fundamentals centrals da nossa constituziun federala. Ella violescha la libertad da religiun, perquai ch'in scumond da construir minarets restrenschess nungiustifitgadaman il dretg da praticgar la cretta per ina part da la populaziun. L'iniziativa cuntrafa er al scumond da discriminaziun, perquai ch'ella sa drizza unicamain cunter in simbol religius da l'islam; symbols architectonics sumegliants d'autras religiuns na vul ella percuter betg scumandar.

En cuntradicziun  
cun la  
constituziun

In scumond da construir minarets fiss er ina intervenziun sproporzionada en cumpetenzas chantunalias e communalas. Oz pon ils chantuns e las vischnancas giuditgar sezs, sch'in project da construcziun è admissibel u betg. I na dat nagins motivs da divergiar da quest urden cumprovà en cas d'edifizis d'ina tscherta cuminanza religiusa. Quest urden cumprovà permetta soluziuns raschunaivlas che corrispondan als basegns locals.

Intervenziun  
en cumpetenzas  
chantunalias  
e communalas

La confederaziun ed ils chantuns na serran betg ils eglis: els san ch'i dat tendenzas extremisticas en l'islam – sco en outras religiuns er. Las autoritads observan talas tendenzas e prendan – sche necessari – mesiras politicas e polizialas. In scumond da minarets è dentant inefficazi en quest cas. Mesiras pli efficazias èn scumonds d'entrar en Svizra e l'expulsion d'imams che predegian in islam extremistic, che n'è betg cumpatibel cun l'urden giuridic e social da la Svizra.

Sche l'iniziativa dal pievel vegniss acceptada, chaschunass quai nunchapientscha a l'exterior e donnegiass la reputaziun da la Svizra. Quai pudess avoir consequenzas negativas per ils interess da noss pajais e da nossa economia.

**Per tut quests motivs recumondan il cussegl federal ed il parlament da refusar l'iniziativa dal pievel «cunter la construziun da minarets».**

Med nunadattà

La reputaziun  
da la Svizra  
patiss





**PP**  
**Spediziun postala**

Trametter enavos a la controlla  
d'abitants da la vischnanca

**Recumandaziun  
a las votantas ed als votants**

Il cussegl federal ed il parlament recumondan a las votantas ed als votants da votar ils 29 da november 2009 sco suonda:

- Gea a la finanziaziun speziala per incumbensas en il sectur dal traffic aviatic
- Na a l'iniziativa dal pievel «per in scumond d'exportar material da guerra»
- Na a l'iniziativa dal pievel «cunter la construcziun da minarets»

Fin da redacziun:  
26 d'avust 2009

Ulteriuras infurmaziuns sut:  
[www.admin.ch](http://www.admin.ch)  
[www.parlament.ch](http://www.parlament.ch)  
[www.ch.ch](http://www.ch.ch)